

# АКАФИСТ СВЯТОМУ ПРЕПОДОБНОМУ МАКАРИЮ, ИГУМЕНУ КАЛЯЗИНСКОМУ, ЧУДОТВОРЦУ

## Кондак 1

Возбранный чудотворче, и изрядный угодниче Христов, многоцелебный источниче и молитвенниче о душах наших, преподобне отче Макарие, яко имей дерзновение ко ко Господу, молитвами твоими от всяких нас бед свободы, да зовем ти: Радуйся, Макарие, скорый помощниче и преславный чудотворче.

## Икос 1

Ангела тя земнаго и человека Небеснаго, преподобне отче Макарие, киими пении и песньми восхвалим, киими венцы увязем трудолюбивую главу твою, и киими словесы возвеличим многоболезненные подвиги твоя; темже благоговеино притекающе к раце многоцелебных мощей твоих, усердно припадающе, со умилением взываем ти: Радуйся, ревностный Христов подражателю. Радуйся, заповедей его истинный блюстителю. Радуйся, ангелов собеседниче. Радуйся, преподобных похвала. Радуйся, верных слуге Господень. Радуйся, усердный чистоты и воздержания хранителю. Радуйся, столпе терпения. Радуйся, образе незлобия и кротости. Радуйся, смиренномудрия наставниче. Радуйся, светильниче многосветлый. Радуйся, непостыдное христиан прибежище. Радуйся, безмездный врачу немощствующих. Радуйся, Макарие, скорый помощниче и преславный чудотворче.

## Кондак 2

Видяще благороднии твои родителие во младости тя, богомудре, совершенная мудрствующа, Господу, даровавшему ти таковая, воспеваху благодарственную песнь: Аллилуиа.

## Икос 2

Разум неуклонный имел еси, преподобне Макарие, аще и юн быв телом, но стар сый умом: вся бо мира сего красная от юности твоя пренебрег, детская игралница презрел еси, псалмы же и песни духовныя Богу Спасителю сердцем и усты непрестанно воспевал еси, научи и нас таяжде мудрствовати и деяти, вопиющих ти: Радуйся, христианския мудрости истинное зеркало. Радуйся, яко божественному желанию ум твой от юности вперил еси. Радуйся, яко во младости твоей временная и земная уметы быти вменил еси. Радуйся, яко единая небесная от сосцу матере твоя возлюбил еси. Радуйся, яко от юности ярем Господень на рамена своя возложил еси. Радуйся, яко плоть поработил еси духу. Радуйся, яко противу кознем диавольским, еще юн сый, стати не уstraшился еси. Радуйся, яко от младенчества чтения Божественных Писаний всем сердцем воз-

любил еси. Радуйся, яко день и ночь в чтении и пении богодухновенных псалмов пребывал еси. Радуйся, яко неплененный страстьми ум твой словом Божиим просветил еси. Радуйся, яко Христа еще в невинной души твоей вселил еси. Радуйся, яко непорочным сердцем возжелел мирскаго мятежа уклонитися, и в пустыню вселитися. Радуйся, Макарие, скорый помощниче и преславный чудотворче.

### **Кондак 3**

Силою Духа Святаго свыше облечен быв, и юности твоей безсильна врага сотворил еси: укрепи, Богоблаженне Макарие, молитвами твоими и нас, во всех благих изнемогающих, да сподобимся с тобою воспевати выну песнь Богу: Аллилуиа.

### **Икос 3**

Имея богатство чистоты душевныя, и высоту смирения, родительское богатство и рабов послужение ни во что же вменил еси, и по разрешении плотскаго соуза, имже на малое время связан был еси, яко олень жаждущий на источники водныя, устремился еси, всеблаженне, в пустыню: в нейже твое высокородство на смиренномудрие, богатство на убожество пременял еси, совлекийся одежды многосветлыя и облекийся в рубище. Темже удивляющесе таковому твоему смиренномудрию, сице ублажаем тя, вопиюще: Радуйся, всяку гордость мира презревай. Радуйся, яко оставив временная, взыскал еси вечная. Радуйся, яко дом велелепный и чертоги украшенны возненавидел еси. Радуйся, яко возлюбил еси убогую хижину паче чертогов преизящных. Радуйся, яко рубищи украсился еси паче одежды златотканныя. Радуйся, яко вместо брашен сластопитательных, возлюбил еси изнуряти плоть твою постом и многим воздержанием. Радуйся, яко не пожелал еси от рабов послужения, но паче сам послужити всем изволил еси. Радуйся, яко возлюбил еси паче одра мягкаго на земли повержение. Радуйся, яко верою правою, аки щитом, защитился еси от всех искушений вражиих. Радуйся, яко неистощимым терпением твоим, паче копия острейшим, врага нашего спасения смертельно уязвил еси. Радуйся, яко неусыпными твоими молитвами, запинателя на пути благочестия безсильна сотворил еси. Радуйся, яко столпе и утверждение добродетели нам явился еси. Радуйся, Макарие, скорый помощниче и преславный чудотворче.

### **Кондак 4**

Бурю сумнительных помышлений укрощая и пролагая в тишину Божественными учении, имиже уверяя себе, яже о Царствии Небеснем, преблаженне Макарие, непрестанно воспевал еси песнь Богу: Аллилуиа.

### **Икос 4**

Слышав преподобне Макарие в Евангелии глас Спасителя взывающ: *иже хочет по Мне ити, отвержется себе, и возмет крест свой, и по Мне грядет,*

отверглся еси себе, и взял на рама крест твой, ходил еси по стопам Христовым невозвратно. Темже мы, недостойнии, воспишем ти таковая, глаголюще: Радуйся, евангельских велений верный блюстителю. Радуйся, Христовых словес твердый хранителю. Радуйся, креста своего усердный носителю. Радуйся, иго Христово и бремя Его благодушно подъемый. Радуйся, яко не обративыйся вспять в шествии к Горнему Иерусалиму. Радуйся, неизсякаемый сосуде благодати Христовы. Радуйся, чистое приятище Духа Святаго. Радуйся, яко вся страсти плотския воздержанием многим умертвил еси. Радуйся, вертограда Христова всеусердный насадителю. Радуйся, яко ум твой к безстрастию возвысил еси. Радуйся, вся благая земли, Небеснаго ради Царствия, за уметы вменивый. Радуйся, равноангельное житие до конца возлюбивый. Радуйся, Макарие, скорый помощниче и преславный чудотворче.

### **Кондак 5**

Богом направляем, всеблаженне отче, безмолвное в пустыни житие обрел еси, и псаломски воспел еси: се покой мой в век века, zde вселюся: в нейже и подвизался еси доблественно в посте и бдении, и от очию многи слезы изливая, непрестанно воспевал еси Богу: Аллилуиа.

### **Икос 5**

Видев суетных имений рачитель неуклонное твое в пустыни пребывание, диавольским наущением возжигаемь, восхоте умертвити тя: но ради постигшия его смертныя болезни пришел в чувство, паде пред ногама твоима, прося у тебе прощения и в пустыни с тобою пребывания. Ты же яко пастырь добрый и незлобивый, приял еси его с радостию, яко овча погибшее, прощая ему вся и причитая его к избранному твоему стаду. Таковое убо твое незлобие, и о спасении заблуждших многое попечение слышавше, по долгу воспеваем ти сице: Радуйся, незлобия присный хранителю. Радуйся, смиренномудрия искренний любителю. Радуйся, образе кротости и терпения. Радуйся, наставниче целомудрия. Радуйся, светоносный столпе, просвещаяй сущия во тьме. Радуйся, обители иноков великое украшение. Радуйся, яко широкий путь, ведущий в пагубу, ненавидети поучал еси. Радуйся, яко тесною и прискорбною стезею шествовати благоискусно внушал еси. Радуйся, древо благоплодное, при исходящих вод Божественных благодати насажденное, и многи питающее. Радуйся, древо благосеннолиственное, многи от зноя прохлаждающее. Радуйся, избраннаго твоего стада стражу неусыпный. Радуйся, благохотных подражателей твоих житием и учением на Небо руководителю и сопутствователю. Радуйся, Макарие, скорый помощниче и преславный чудотворче.

### **Кондак 6**

Проповедницы быша твоего незлобия и прозорливости татие, егда похищенная ими животная к тебе возвратиша, и вместо наказания прияша от тебе отеческое наставление, видевше же такое твое незлобие, со многим удивлением отшедше, воспеша песнь Богу: Аллилуиа.

### **Икос 6**

Возсиял еси в пустыни, яко заря пресветлая, преподобне отче, просвещая и наставляя на путь спасения вся к тебе притекающия, сего ради со многим удивлением взываем ти сице: Радуйся, заре пресветлая, от пустыни восходящая и души верных озаряющая. Радуйся, заблуждших истинный наставниче. Радуйся, целомудрия зеркало. Радуйся, истинный образе благочестия. Радуйся, алтаря Господня благоговейный служителю. Радуйся, иноческаго равноангельнаго жития ревнителю. Радуйся, безмолвия древних Богоносных отец подражателю. Радуйся, столпе огненный, наставляяй на путь спасения. Радуйся, солнце светозарное, яко своими лучами души наша, от мраза греховнаго погибающыя, согреваеши. Радуйся, луна пресветлая, яко ночь нашего неразумия прогоняеши. Радуйся, Божественнаго о людях промышления всеусердный служебниче. Радуйся, вечныя нашей радости теплый ходатаю. Радуйся, Макарие, скорый помощниче и преславный чудотворче.

### **Кондак 7**

Хотя расслабленный Захария совершенное получитьи себе здравие, моли принести себе и положить пред ногама твоима, преподобне отче, да твоими молитвами получит исцеление. Ты же яко врач премудрый, уврачевал недуги его телесныя вкупе же и душевныя, воспел еси Господу благодарственную песнь: Аллилуиа.

### **Икос 7**

Дивное имел еси житие, и дивныя чудеса сотворил еси на земли, преподобне отче Макарие, егда узрев единого юношу, многое время бесом мучима, умилился прослезился еси, и воздохнув сотворил еси молитву к Богу: абие же изыде бес из страждущаго, и бысть здрав. Мы же таковая слышавше, с радостию взываем ти сице: Радуйся, лукавых духов крепкий победителю. Радуйся, душепагубных волков прогонителю. Радуйся, воине Христов непобедимый. Радуйся, рабе Божий, благий и верный. Радуйся, врачу скорый с верою тебе призывающих. Радуйся, лозо благоплодовитая. Радуйся, яко твоим пособием сокрушаются козни вражия. Радуйся, совоителю премудрый, ратующим противу сил адových. Радуйся, неоскудный поток чудесем. Радуйся, обильный благодатию источник исцелений. Радуйся, трисолнечнаго света пресветлая луче. Радуйся, человеце Божий, преподобием и истиною, аки поясом златым, пропоясанный. Радуйся, Макарие, скорый помощниче и преславный чудотворче.

### **Кондак 8**

Дивное и неизреченное чудо благодати Небесныя, является ныне во очию всех верных: долготерпеливый бо и многомилостивый Господь не прогневался на ны до конца за беззакония наша, но, помянув щедроты Своя, дарова нам тебе, досточудне отче, заступника изрядна, и тако вознесе рог спасения нашего, да выну поем ему: Аллилуиа.

### Икос 8

Весь еси в вышних, но и нижних не оставлявши, преподобне отче Макарие, присно со Христом царствуеши, и о нас, грешных, молитвы к Нему возносиши: не точию бо припадающих к цельбоносным мощем твоим, но и далече отстоящих, призывающих же всечестное имя твое, предстательством твоим соблюдаеши от всякаго зла. Темже во умилении зовем ти: Радуйся, прибежище наше во всех скорбех. Радуйся, скорый помощнице всех в бедах сущих. Радуйся, целителю болезней душевных вкупе и телесных. Радуйся, на невидимыя враги наша сильный поборниче. Радуйся, посетителю благосердый в немощи лежащих. Радуйся, утешителю в печали сущих. Радуйся, яко тобою престаает рыдание. Радуйся, яко тобою подается радование. Радуйся, яко Христу добльственно последовал еси. Радуйся, яко Сладчайшему Иисусу до конца послужил еси. Радуйся, яко наслаждаешься лицезрения Божия. Радуйся, яко сподобился еси зрети невечерний день Царствия Его. Радуйся, Макарие, скорый помощниче и преславный чудотворче.

### Кондак 9

Всякия скорби претерпел еси, и многи труды и подвиги добльственно совершил еси, шествуя по пути спасения до маститыя старости, облечен во всеоружие Божие, во плоти аки безплотен, умерщвляя страсти и сокрушая наветы миродержителя тьмы века сего, темже к Небесным сопричислен силам, купно с ними воспеваеши Богу: Аллилуиа.

### Икос 9

Ветия многовещанная недоумеют достойно восхвалити тя, богомудре Макарие: кто бо доволен разумети вся борения твоя с миродержителе тьмы века сего; или кто изочтет труды, болезни и подвиги твоя, в них же пустыннолюбное житие совершал еси; обаче мы, любовь твою побеждаеми, благодарно тебе зовем: Радуйся, закона Божия исполнителю всеусердный. Радуйся, чистотою и целомудрием, многоценнаго бисера честнейший. Радуйся, в терпении и борении противу плоти, адаманта твердейший. Радуйся, смиренномудрием и кротостию паче славных земли прославленный. Радуйся, во плоти аки безплотен на земли поживый. Радуйся, живыми и спасительными слезами огонь похоти угасивый. Радуйся, борющимся со страстьми и похотьми помощниче благоуспешный. Радуйся, в трудех, бдении и воздержании великим постником подражателю ревностнейший. Радуйся, в духовней мудрости наставниче благоискуснейший. Радуйся, подвигов иноческих показателю рачительнейший. Радуйся, пустынножителей красота. Радуйся, горлице пустынолюбная и добровидная. Радуйся, Макарие, скорый помощниче и преславный чудотворче.

### Кондак 10

Храняй вся кости праведных, яко ни единой от них сокрушится, Господь и Бог наш Иисус Христос явил нам твое тело нетленное на земли, преподобне от-

че, яко живоносную купель, врачующую всяку болезнь и всяку язю в людех. Темже приявше такового целebника и молитвенника, благодарственно вопием ему: Аллилуиа.

### **Икос 10**

Стену ты тверду и молитвенника изрядна стяжав святая обитель твоя, и вси страны Российстии хвалятся заступлением твоим. Темже и мы грешнии, яка чада отца молим: заступи и сохрани нас от искушений и скорбей, бед и напастей молитвами твоими, да взываем ти радостно: Радуйся, благовонный крине райскаго вертограда. Радуйся, кипарисе, верных сердца благовонием исполняя. Радуйся, немощных целebниче. Радуйся, жезле, падающих подкрепляя. Радуйся, надежде и отишие в мори жития сего плавающих. Радуйся, твердое ограждение и прибежище усердно Богу работающих. Радуйся, всех усердно притекающих к тебе, искушений и бед скорое избавление. Радуйся, всех обуреваемых покрове твердый. Радуйся, яко от обители земныя в обитель Небесную преселился еси. Радуйся, яко от обители Небесныя в обитель земныя благовония нисходиши. Радуйся, яко и по отшествии твоём с нами пребываеши. Радуйся, яко и по преставлении твоём, умерщвленных грехми души наша молитвами твоими воскрешаеши. Радуйся, Макарие, скорый помощниче и преславный чудотворче.

### **Кондак 11**

Пения и песни духовныя Троице Единосущней, сердцем и усты на земли выну приносил еси, блаженне Макарие: темже и ныне на Небесех, с ангельскими чинми Троицескому предстою Престолу, непрестанно воспеваеши Божественную песнь: Аллилуиа.

### **Икос 11**

Светоподательнаго светильника, просвещающаго души наша, верую видим тебе, преблаженне отче, пред Престолом Божиим стояща, и твоим блистанием озаряеми, зовем ти таковая: Радуйся, облаче светозарный, просвещая души наша. Радуйся, вода спасительная, всех напаяющая. Радуйся, пастырю предивный. Радуйся, учителю премудрый. Радуйся, чистоты селение. Радуйся, печальных утешение. Радуйся, сирых питателю. Радуйся, обидимых предстателю. Радуйся, премудрости Божия приятелище. Радуйся, неисчерпаемый источниче благодати исцелений. Радуйся, превозвестниче Божиих велений. Радуйся, сокровище милосердия Божия неистощимое. Радуйся, Макарие, скорый помощниче и преславный чудотворче.

### **Кондак 12**

Благодать свыше ты данную познавше, благоговейно лобызаем честныя мощи твоя, яже Господь благоволил дивно явити нам. Темже благодарственно вопием Христу Богу нашему: Аллилуиа.

### **Икос 12**

Поюще твое к Богу отшествие, преподобне Макарие, почитаем священную память твою, величаем твое смиренномудрие, хвалим твое долготерпение, славим незлобие твое, ублажаем подвиги твоя и кончину течения твоего, яко венец правды приял еси от Господа, Судии праведнаго. Темже молящися усердно, о еже сподобитися и нам неосужденно предстати Страшному Судищу Христову, взываем ти: Радуйся, у Престола Божия теплый о нас предстателю. Радуйся, мужу, прославивый Бога в души и в теле твоем. Радуйся, совершенный в добродетелех человеце. Радуйся, дивный подражателю Отца нашего Небеснаго. Радуйся, устроителю обители монашествующих. Радуйся, преблагий и добрый наставниче иноков. Радуйся, всех православных скорый помощниче и заступниче. Радуйся, Царя Небеснаго известный умилоствителю. Радуйся, многожды заступлением твоим прошения предворяяй. Радуйся, Небесный гражданин. Радуйся, яко с преподобными и праведными веселишися. Радуйся, яко со всеми избранными Божиими присно торжествуеши. Радуйся, Макарие, скорый помощниче и преславный чудотворче.

### **Кондак 13**

О преславный и предивный отче Макарие, приими благоутробно сие малое моление наше, и твоим сильным и благоприятным пред Богом ходатайством, избави нас от всех враг видимых и невидимых, от всякия напасти и скорби, от внезапныя смерти и будущия муки, да сподобимся с тобою и со всеми святыми во веки воспевати Богу Спасителю нашему благодарную песнь: Аллилуиа, Аллилуиа, Аллилуиа.

**(Этот кондак читается трижды, а затем икос 1 и кондак 1)**